

ARLeF: par doi dîs, Udin capitâl des lenghis europeanis

L'NPLD al à sielt la capitâl furlane par screâ la Summer University. Ai 13 e ai 14 di Setembar, tancj moments impuartants di incuintri, di alt nivel, sul teme de promoziun des lenghis minoritariis

Par doi dîs, ai 13 e 14 di Setembar, **Udin al sarà la capitâl des politichis linguistichis europeanis**. Inte citât, di fat, si davuelzarà un moment impuartant di incuintri volût dal *Network to Promote Linguistic Diversity (NPLD)* - Rêt par Promovi la Diversitât Linguistiche -, su propueste de ARLeF (Agenzie Regjonâl par Lenghe Furlane) e cul patrocini de Fondazione Coppieters di Brussel, specializade in federalisim e politichis linguistichis. «E sarà une **oportunitât uniche pe nestre Regjon** – al à sclarît il diretôr de Agenzie, William Cisilino – stant che **o screarìn propit chi la Summer University che l'NPLD al à decidût di inviâ tacant di chest an**. In graciis di chest, o varin la ocasion di ospitâ in Friûl i **docents e i esperts plui impuartants a nivel mondiâl** su lis politichis linguistichis. Il *Network* al è une ocasion uniche di confront – al va indevant Cisilino – che nus permet di capî cemût che altris realtâts europeanis a sedin rivadis a garantî un avignî ae lôr lenghe midiant politichis linguistichis buinis».

Ae viertidure de *Summer University*, ospitade de Universitât dal Friûl in Palaç Garzolini di Toppo Wassermann, a saran presints l'assessôr regjonâl cu la deleghe aes lenghis minoritariis, **Pierpaolo Roberti**; il President dal Consei regjonâl **Pier Mauro Zanin**; il Sindic di Udin, **Pietro Fontanini**; la vicepresidente dal NPLD **Sabrina Rasom**; il diretôr de ARLeF **William Cisilino** e **Fabiana Fusco** in rapresentance dal Ateneu furlan che al à colaborât ae organizazion di chest prestigjôs apontament internazionâl midiant dal CIRF - Centri interdipartimentâl pal svilup de lenghe e de culture dal Friûl.

Lis relaziuns tecnicis, in program subit dopo, a saran tignudis di Vicent Climent-Ferrando de Universitât Pompeu Fabra di Barcelone (Politichis linguistichis pes societâts complessis di vuê: cirint une politiche linguistiche “juste”); Vesna Crnić-Grotić, de Universitât di Rijeka (“I dirits linguistics”); Sixto Molina, dal Consei de Europe (“La Cjarte europeane pes lenghis regjonâls o minoritariis”); Gabriele Iannàccaro, de Universitât di Milan-Bicocca che, intal so dopli intervent, al indreçarà la analisi sui temis leâts aes fondis sociolinguistichis pe planificazion des lenghis.

La di dopo, François Grin, de Universitât di Gjinevre, al puartarà un so intervent sul teme: “Economie e lengaç: storie, impostazions gjenerâls e interazions fra linguiscj e linguistiche”; Michele Gazzola, de Universitât di Lugano, al fasarà une analisi su la cuistion dal: “Monitorament de politiche linguistiche: struments politics e indicadôrs”; la relazion tra coscj e beneficis des politichis linguistichis e sarà tratade di François Vaillancourt, professôr emerit tal Dipartiment di economie de Universitât di Montréal.

L'apontament si davuelzarà a puartis sieradis, stant che la *Summer University* dal NPLD e je indreçade dome ai membris di cheste Rêt che a rapresentin uns vincj guviers regjonâi e statâi europeanis là che si cjatin minorancis linguistichis. La iniziative furlane e viodarà ancje la **partecipazion di rapresentants dal Consei de Europe** che a varan cussì la ocasion di cognossi miôr la nestre regjon e di “pierdisi” intal clime enogastronomic apassionant di Friûl Doc.

Udin, ai 6 di Setembar dal 2018

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
 Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<